

Autobahn

De Autobahn A twei
is vull Varkehr, o weih.
Morgens, middags, abends un bie Nacht,
wer härre freuher dat edacht?

Hüte geiht et mal hille un mal suttsche,
sä sachte, wie mit ne Kutsche.
Lastwagen, Bus un Auto, nü allens steiht:
Et geiht nich, wenn et nich geiht!

Allens steiht stille,
et is üte mit hille.
Pollizei, Fülerwehr un noch en Kran
maket denne endlich reine Bahn.

Lüttschig, ganz lüttschig geiht et weer lus
un balle is et en dullet Gebrus.
Et geiht ne Tied güt,
ohne Blaulicht un tütüt.

Un doch, alweer is et üte,
hier is ne Büstirre hüte.
Se maket den Mittelstriepen reine
von Brönswiek bet Peine.

Denne Lehrte un Hannover,
da steiht en Auto koppober.
For de Lüe is et sä afegahn,
de seihe ik rundrumme stahn.

Ik mot nich mehr ganz wiet,
bin aber al twei Stunne ober de Tied.
Nü fäuhere ik von de Autobahn
un kann balle in'n Parkhüse stahn.

Ik lupe de Treppenstiege runder
un et is wie en Wunder:
In Langenhagen is de Fleiger noch da,
ik weit nich, wie et geschah.

Dat nächste Mal kam ik mit de Iesenbahn,
da was ik tä de rechten Tied ran.
Jie künnt mik aber gern bedüern,
drei Stunnen dörste ik up den Fleiger lüern.

Mehr Texte in: „Ahlers, Rolf; Köhler, Ilse; Mahlmann, Siegfried
und Zimmermann, Regina (Herausgeber): **De Bottervogel** –
Plattdeutsch-Fibel für Kinder und Erwachsene“ – Buch mit
Audio-CD, der gesamte Text als Hörbuch, 68 Seiten, 14,50 €,
ISBN 978-3-932030-44-4. Geschichten, Reime und vieles mehr,
zum Lesen, Vorlesen, Spielen, Singen und Hören.